



Broj: 03/3-50-1-9-9/09  
Sarajevo, 15.04.2009.

## Z A P I S N I K

### 9. sjednice Zajedničke komisije za ekonomske reforme i razvoj oba doma Parlamentarne skupštine Bosne i Hercegovine, održane 15.04.2009. godine

Sjednica je počela u 09.00 sati.

Dijelom sjednice je predsjedavao g. Ivo Miro Jović, a dijelom g. Zoran Koprivica, novoimenovani predsjedavajući Komisije.

Sjednici su prisustvovali: g. Zoran Koprivica g. Bajazit Jašarević, g. Mehmed Suljkanović, g. Ivo Miro Jović, g. Adem Ibrahimpašić, g. Hazim Rančić, g. Hadži Jovan Mitrović, g. Slobodan Šaraba, članovi Komisije.

Sjednici je prisustvovao i g. Amer Bekrić, sekretar Zajedničke komisije za ekonomske reforme i razvoj oba doma Parlamentarne skupštine Bosne i Hercegovine, te g. Zoran Brkić iz Sektora za odnose sa javnošću.

Za sjednicu je predložen i jednoglasno usvojen sljedeći

## D N E V N I R E D

1. Usvajanje Zapisnika 8. sjednice Zajedničke komisije;
2. Upoznavanje sa ostavkom na mjesto Predsjedavajućeg Zajedničke komisije za ekonomske reforme i razvoj i Prijedlog Klub delegata srpskog naroda PS BiH za imenovanje g. Zorana Koprivice na mjesto Predsjedavajućeg Zajedničke komisije za ekonomske reforme i razvoj;
3. Razmatranje Izvještaja o radu Vijeća ministara BiH za 2008. godinu;
4. Tekuća pitanja

### Ad.1.

#### Usvajanje Zapisnika 8. sjednice Zajedničke komisije za ekonomske reforme i razvoj

Nakon provedene diskusije, Zapisnik 8. sjednice Zajedničke komisije za ekonomske reforme i razvoj jednoglasno je usvojen.

### Ad.2.

#### Upoznavanje sa ostavkom na mjesto Predsjedavajućeg Zajedničke komisije za ekonomske reforme i razvoj i Prijedlog Klub delegata srpskog naroda PS BiH za imenovanje g. Zorana Koprivice na mjesto Predsjedavajućeg Zajedničke komisije za ekonomske reforme i razvoj

Komisija je upoznata sa Odlukom o izmjeni Odluke o izboru članova zajedničkih komisija oba doma PS BiH („Službeni glasnik BiH“, broj 25/09), kojom je g. Drago Ljubičić, dosadašnji Predsjedavajući Komisije, razriješen sa dužnosti člana Komisije, te istovremeno g. Zoran Koprivica izabran za člana Komisije. Uvažavajući sugestiju Kluba delegata srpskog naroda u Domu naroda PS BiH, a na osnovu odredaba Poslovnika Predstavničkog doma i Poslovnika Doma naroda PS BiH, **g. Zoran Koprivica je jednoglasno izabran za Predsjedavajućeg Komisije, te je preuzeo predsjedavanje Komisijom.**

**G. Zoran Koprivica** je u uvodnom obraćanju je naglasio da smatra da se Komisija treba izboriti za veći značaj budući da postoje institucije na nivou BiH (DEP, Agencija za promociju stranih ulaganja (FIPA), Agencija za promociju izvoza Bosne i Hercegovine, Ured za veterinarstvo BiH, Uprava za zaštitu zdravlja bilja BiH, Direkcija za Europske integracije i Ministarstvo finansija i trezora u dijelu koji se odnosi na primjenu decentralizovanog sistema implementacije upravljanja programima pomoći EU u BiH, institucije na nivou BiH koje su nadležne za poljoprivredu, prehranu i ruralni razvoj i sl.), a čiji djelokrug, planovi i izvještaji o radu, potencijalno mogu biti predmet razmatranja na Komisiji. Pozivajući na saradnju, g. Koprivica je predložio da svi članovi Komisije uzmu aktivno učešće u dopuni programa rada.

Nakon provedene diskusije po ovom pitanju, prijedlog g. Koprivice je usvojen i donešen je **ZAKLJUČAK** kojim se **zadužuju svi članovi Komisije da uzmu aktivno učešće u dopuni programa rada.**

### **Ad.3.**

#### **Razmatranje Izvještaja o radu Vijeća ministara BiH za 2008. godinu;**

**G. Zoran Koprivica** je dao uvodna izlaganja o Izvještaju o radu Vijeća ministara BiH za 2008. godinu.

U diskusiji su učestvovali g. Ivo Miro Jović, g. Adem Ibrahimpašić, g. Mehmed Suljkanović, g. Slobodan Šaraba i g. Hadži Jovan Mitrović

**G. Adem Ibrahimpašić** se u diskusiji kritički osvrnuo na Izvještaja o radu Vijeća ministara BiH za 2008. godinu, posebno ističući nedostatak mjera za obezbjeđenje povećanog plasmana domaćih roba na vlastitom tržištu uvođenjem necarinskih barijera robama iz CEFTA sporazuma na način na koji su našim robama takve barijere uvele vlade susjednih zemalja kroz svoje zakonske i podzakonske akte, u smislu smanjenja trgovinskog deficita sa ovim zemljama. U tom smislu, g. Ibrahimpašić je uručio pisani materijal na ovu temu koji predstavlja sastavni dio zapisnika.

Nakon provedene rasprave, Zajednička komisija za ekonomske reforme i razvoj, na prijedlog g. Koprivice, predsjedavajućeg, jednoglasno je usvojila sljedeće **zaključke**:

**a)** Zajednička komisija za ekonomske reforme i razvoj konstatira da dostavljeni Izvještaj nije izvještaj o radu Vijeća ministara BiH nego zbir izvještaja o radu ministarstava.

**b)** Obzirom da je Vijeće ministara BiH, u skladu sa članom 163. Poslovnika Predstavničkog doma PSBiH i članom 156. Poslovnika Doma naroda PSBiH, obavezno dostaviti izvještaj o svom radu najmanje jednom godišnje, Zajednička komisija za ekonomske reforme i razvoj sugerira kolegijima oba doma da se od Vijeća ministara BiH traži da se dostavi pregled planiranih, realiziranih i nerealiziranih aktivnosti, uz navođenje razloga nerealiziranja planiranih aktivnosti.

**c)** Zajednička komisija za ekonomske reforme i razvoj sugerira kolegijima oba doma da se od Vijeća ministara BiH traži da se Izvještaj upotpuni segmentima koje isti ne sadržava, te da se nakon toga uputi u dalju proceduru.

(NAPOMENA: Usvojeni zaključci su u formi Mišljenja o Izvještaju o radu Vijeća ministara BiH za 2008. godinu, dostavljeni domovima.)

### **Ad.4.**

#### **Tekuća pitanja.**

Pod ovom tačkom dnevnog reda nije bilo rasprave.

Sjednica je završena u 10,00 sati.

Sekretar Komisije

**Amer Bekrić**

Predsjedavajući Komisije

**Zoran Koprivica**